

«Giuventetgna meglra che lur reputaziun»

■ **(anr/fa) Dapi 20 onns presta l'AGA lavur d'infurmaziun e prevenziun cunter la malsogna Sids/Sida. A ses project «amar la vita» s'han participadas 40 musicistas e musicists rumantschs.**

«Ozendi audan ins savens novitads pauc bunas da la giuventetgna», ha ditg *Jan Boner* da l'Agid grischun cunter Aids/sida (AGA) e manader da project, «la gronda participaziun a noss project ha dentant mussà che quella reputaziun nauscha nun è adina giustifitgada.» Il project «amar la vita» ha lantschà l'AGA ensemen cun il Radio Rumantsch (RR) la primavaira 2007. Tschertgads eran songs rumantschs davart ils temas amur, sex ed Aids.

Passa 3000 auditurs han dà lur vusch

«Cun grond engaschament s'han participads passa 40 musicistas e musicists rumantschs da la Surselva fin la Val Müstair», ha cuntinuà Boner. Dals blers songs dals Lumpaz, Pobufibanox, Bulais, AndaRojo, Recktonerorckers, *Simona Caminada*, Notschtröm, *Theo Demund*, The Capoonz, Arsaja, *Stiff Woodies* e *Mario Pacchioli* era da tscherner sis. Quai han fatg audituras ed auditurs dal RR che s'han participads al radiovoting ensemen cun ina giuria d'experts independenta. Las chanzuns victuras èn «Deliberada» da Notschtröm, «Buc a ti» da Pobufibanox, «Viva» dad AndaRojo, «Daco» da Simona Caminada, «Mo per tei» da The Capoonz e «Sut la pial» da Mario Pacchioli. Ils musicists han pudì registrar lur songs en il studio. Sco

padrin dal disc cumpact «amar la vita» che vegn battegià la mesadad da matg a Cuira s'ha mess a disposiziun cusseglier guvernativ *Martin Schmid*.

«Passa 700 novas infecziuns l'onn»

«Grazia a las campagnas e la lavur engaschada per exempel da la AGA san ils umans co ch'ins po sa proteger d'ina infecziun cun il virus privlus», ha ditg Schmid. El menziunà ils medicaments che stattan ozendi a disposiziun e che gidan a franar la multiplicaziun dal virus HI. «La conseguenza dentant è che HIV ed Aids na fan pli uschè gronda tema sco a l'entschatta», ha'l cuntinuà, «e quai è fitg privlus.» Ch'ìls umans na sajan pli uschè precauts, uschia ch'il dumber da novas infecziuns cun HIV s'haja puspè augmentà durant ils ultims onns: En Svizra s'infeteschan mintg'onn passa 700 persunas cun il virus, en il Grischun s'haja registrà l'onn passà almain 9 infecziuns. «Quai èn 9 infecziuns meina bler», ha punctuà il cusseglier guvernativ, «mintga diagnosa 'HIV-positiv' signifitga gronda paina.» Las terapias èn sco ch'el ha ditg savens colliadas cun effects collaterals massivs, ils quals diminuischan ferm la qualitat da viver dals pertutgads. «Perquai èsi necessari da cuntinuar cun la prevenziun da HIV/Aids.» El ha ludà il project cuminaivel da l'AGA e RR.

«Ina metoda da prevenziun innovativa»

Per procurar ch'ìls giuven na chalian d'esser precauts e da sa

proteger cunter il virus HI èsi tenor Martin Schmid necessari da chattar novas vias: «Cun quest project è quai gartegià fitg bain», ha el manegià, «giuvenils s'han confruntads cun la tematica HIV ed Aids ed han producì songs, cun tadlar las chanzuns e tscherner sis d'ellas han fatg quai er las passa 3000 audituras ed auditurs dal RR.» Cun musica pon ins a l'avis dal cusseglier guvernativ cuntanscher ils giuvenils sin il nivel emoziunal: «Jau sun persvas che la musica dad 'amar la vita' vegn a conquistar ils cors da giuven e vegl e fortifitgar puspè la precauziun en connex cun il privel da s'infectar cun Aids.» El ha engrazià a las collavuraturas ed als collavurats da l'AGA per lur gronda lavur d'infurmaziun e prevenziun durant ils ultims 20 onns. Sco padrin ha'l pudì avrir la prevendita dal DC.

Battaisem cun gronda festa e blera musica

Il battaisem dal disc cumpact vegn ad avair lieu ils 16 matg 2008 en il Palazzo a Cuira. La festa vegn a vegnir embellida cun blera musica live d'AndaRojo, Simona Caminada, The Capoonz, Notschtröm, Mario Pacchioli e Pobufibanox. Al giast d'onur *Susanna Lüthi* che s'engascha gia dapi blers onns per la lavur da prevenziun cunter Aids e ch'era er commembra da la giuria ha surdà Martin Schmid l'emprim ticket. Ils tickets inclusivamain il DC pon ins empustrar via internet www.aidshilfe.ch.



Il giast d'onur, il padrin e dus musicists dals Capoonz: *Mira Westner*, *Susanna Lüthi*, *Vito Cadonau* e *Martin Schmid* (da san.).